



Fundasaun Mahein (FM), 30 Setembru 2020

Komunikadu Imprensa

Situasaun Droga iha Timor-Leste no Dezafiu sira

“Iha Âmbitu Implementasaun Lei N.º 2/2017 kona-bá Kombate Tráfiku no Konsumu Ilísitu ba Droga”

Iha tinan 2014 Timor-Leste ratifika kona-bá Konvensaun Nasoins Unidas nian Kontra Tráfiku Ilísitu ba Estupefasiante no Substansia Psikotrópika 1988 nian. Medida kontinuasaun husi ratifikasaun ne'e – iha tinan 2016 Ministériu Justisa Timor-Leste lidera avaliaasaun ba asuntu sira krime organizadu nian konklui katak tráfiku droga la'os hanesan ameasa ne'ebé boot. Nomos merkadu domestika ba trafiku droga relativamente kiik Maibe Timor-Leste iha perigu hanesan area pasajem ba nasaun viziñu sira hanesan Indonézia.

Esforsu importante ida iha nivel polítika – iha tinan 2017 aprova Lei N.º 2/2017 kona-bá Kombate Tráfiku no Konsumu Ilísitu ba Droga. Maske nune'e, Lei refere sei iha falta balu ne'ebé presiza hadi'a ka atualiza kada tinan tuir evolusaun ne'ebé justifika iha relasaun ho ai-horis, substansia ka materia sira ne'ebé hatuur iha Lei refere.

Bainhira aprova tiha Lei N.º 2/2017 kona-bá Kombate Tráfiku no Konsumu Ilísitu ba Droga, no substansia, ai-horis no produktu kimiku hotu ne'ebé hatuur iha Aneksu I no Aneksu II Tabela I – VI Lei ne'e nian. Iha tinan tuir mai autoridade seguransa timor-oan prende prekursor ho tipu PCC tonelada 160 iha Portu Dili. Rezultadu investigasaun no teste prova katak materia ne'ebé kontein iha kontentor sia nian laran pozitivu PCC. Maske nune'e, prekursor PCC la regula iha Lei N.º 2/2017 kona-bá Kombate Tráfiku no Konsumu Ilísitu ba Droga. Ikus mai desizaun Tribunal Rekursu nian absolve tiha arguidu sira husi kazu ne'e. Maibe PCC tonelada 160 hela “a favor” ba estadu no destroi ona iha inisiu fulan Setembru 2020.

Kazu hanesan akontese iha tinan 2019, mane ida (timor-oan) nu'udar emperezariu nasional importa mos prekursor ho tipu Carisoprodol ho Kg 250 no autoridade seguransa prende hafoin tula sai husi Aeroportu Internasional Prezidenti Nicolau Lobaró, Dili. Desizaun ikus – arguidu ba kazu ne'e livre total (ka absolve) tamba Carisoprodol la regula iha Lei N.º 2/2017 kona-bá Kombate Tráfiku no Konsumu Ilísitu ba Droga ne'ebé hatuur iha Tabela I – IV no V no VI.

Ida ne'e akontese tamba Lei N.º 2/2017 kona-bá Kombate Tráfiku no Konsumu Ilísitu ba Droga seidak atuliza. Maske Lei refere hatete katak tenke atualiza nafatin bainhira de'it razaun ruma hatebes katak iha duni evolusaun kuiñesimentu sientífiku kona-bá ai-horis, substansia no preparadu.

Tuir Lei N.º 2/2017 kona-bá Kombate Tráfiku no Konsumu Ilísitu ba Droga hatete asuntu kombate droga presiza iha organizmu especial ida ne'ebé iha kbiit atu koordena asaun hotu husi entidade nasional ne'ebé buka tuir dalan atu kombate droga no iha kna'ar atu

haburas no asegura kooperasaun ho entidade estranjeiru hodi kombate tráfiku ilísitu. Entidade ne'e mos iha kbiit akompañia lala'ok aplika banati ne'ebé hatuur iha konvensaun ne'ebé Timor-Leste ratifika ka atu retifika kona-bá substansia estupefasiente no psikotrópika. Maske nune'e, desde Lei ne'e tama iha vigor seidauk inisia no halo diskusaun kona-bá organizmu especial kombate droga nian.

Asuntu seluk relasiona entidade koordenador kombate droga nian ne'ebé sei harii, liu-liu kompetensia sira ne'ebé atua husi entidade ne'e nian hodi akompañia lala'ok aplika no banati sira ne'ebé hatuur iha konvensaun internasional sira. Timor-Leste preziza ratifika mos konvensaun rua seluk kona-bá kombate droga, iha planu internasionál, hanesan Konvensaun Únika kona-ba Estupefasiente 1961 nian, modifika hosi protokolu 1972 nian, no Konvensaun kona-bá Substánsia Psikotrópika 1971 nian.

Rekomendasaun

1. Rekomenda ba Parlamentu Nasional no Governu preziza atualiza Lei N.º 2/2017 kona-bá Kombate Tráfiku no Konsumu Ilísitu ba Droga iha materia sira ne'ebé regula kona-bá prekursor nian hanesan Paracetamol, Carisoprodol no Caffein (PCC) nomos substansia ka ai-horis seluk ne'ebé produs no atu produs ba droga. Atu atualiza Lei ida tenke ho proposta Ministériu Saúde no Ministériu Justisa nian no rona mos entidade relevante sira.
2. Rekomenda ba Governu preziza kapasita autoridade relevante sira hanesan polísia no autoridade sira ne'ebé servisu iha area sira ne'ebé kritiku hodi eleva sira nia kapasidade no kuiñesementu kona-bá kombate droga. Nomos apoiu ekipamentu no facilidade nesesariu sira hodi tulun sira nia servisu iha area sira investigasaun nian.
3. Rekomenda ba Governu preziza inisia no diskute kona-bá kriasaun entidade koordenadora kombate droga nian hodi tau matan spesifiku ba kombate droga nian iha Timor-Leste no koordenaun sira ho entidade sira rai liur.
4. Rekomenda ba autoridade sira ne'ebé servisu iha aeroportu, portu no fronteira terestre kontinua disiplina no servisu tuir prosidementu sira ne'ebé estabese ona. Kazu timor-oan na'in (kazal) nu'udar lisaun importante ba autoridade sira ne'ebé servisu iha area sira kritiku. Katak droga ne'ebé hetan aprensaun husi autoridade Indonézia nian tama liu husi Aeroportu Internasional Prezidente Nicolau Lobato - Dili no sai ba nasaun distinasan liu husi Postu Batugade maibe la detekta.

Atu hetan informasaun kle'an liu kona-bá asuntu ne'e bele kontaktu:

João Almeida

Acting Director

Email: almeidamahein@gmail.com

Telemovel: (+670) 7756 1184 / 7710 3346

Website: www.fundasaunmahein.org